

Date – 02/08/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Union Home Minister Pu Amit Shah chuan Cyclone Remal tuartute chhawmdawlna sum engemawzat Mizoram tan pek a nih tur thu Chief Minister Pu Lalduhoma a hrilh.
2. Adviser to Chief Minister Pu TBC Lalvenchhunga'n kawng hrang hranga sawrkar sum inren avangin pawisa tam tak an hum thei a ti.
3. President Draupadi Murmu-i kaihhruaiin Governor Conference ni hnih awh chu vawiin khan Rashtrapati Bhavan-ah tan a ni.
4. Kerala-a Wayanad district leiminnaah ruang zawn hna ngawrh taka thawh mek a ni.

<><><>

CM

Union Home Minister Pu Amit Shah chuan Cyclone Remal tuartute chhawmdawlna sum engemawzat Mizoram tan pek a nih tur thu Chief Minister Pu Lalduhoma a hrilh.

He thu hi nimina Chief Minister Pu Lalduhoma'n New Delhi-a a kawmnaah sawiin, Cyclone Remal tuartute endika rawn kal special team te report chu Finance lamah a la awm a, hei hi a rang lama a lo ngaihven tur thu Home Minister chuan a sawi a ni.

Chief Minister hian, tunhnaia sawrkar laipuiin raltlan te tana Mizoram sawrkar cheng vbc 10 a rawn pek avangin Home Minister hi lawmthu a hrilh a. Manipur harsatna tawh thuah Home Ministry leh Manipur tlangmi mipuite aiawh ITLF hrulaitute chu inbe thei se thaa a hriat thu a hrilh bawk a. Chief Minister chuan Manipur Chief Minister Pu Biren Singh-a'n Imphala zin tura a sawm thu pawh Pu Amit Shah hi hrilhin tihhlawhtlinsak a duh thu a sawi a ni.

Assam Rifle sawn chhuah chungchang pawh an sawi dun a. Assam Rifle lamin an MoU tur an peih har avanga hmalakna a khawtlai tak thu tarlan a ni a. Home Minister hian, Ministry atangin officer pahnih a rawn tirh tur thu leh, anni pahnih bakah Assam Rifles te nen Aizawlah lo sawiho leh turin Chief Minister hi a lo hrilh a. A tahtawla an chhuah phei a tul tur thu pawh a sawi a ni. Chief Minister hian, Assam Rifle leh Mizoram sawrkar ngaihndan inhmum rem lo lai te a awm a nih chuan inpawh taka sawiho an inpeih thu a hrilh ve bawk a ni.

Pu Lalduhoma hian DoNER Minister Pu Jyotiraditya Scindia pawh kawmin Serchhip district hospital sak dan tur te, Mizoram a oil palm chingtute chungchang leh Ministry of DoNER hnuaia Mizoram project kal lai la tihhlawhtlin loh a neih chungchang te an sawi a.

Nizan Khan Chief Minister hi Intelligence Bureau of India Director Pu Tapan Deka chuan Mizoram House-ah hmuin Mizorama hmalak dan tur thil te an sawi dun a. Delhi ah hian Chief Minister hian JICA hotute leh KMMTTP Contractor te pawh kovin an hnathawh mek leh hmachhawp te a sawipui bawk a ni.



## COMPLAINT BOX

Minister te'n an pisa-a mipui tana rawtna leh sawiselna lehkha an thehluh theihna, Complaint box an hunah tun thlengin mipui lehkha theh luh a tam lo hle a.

MINECO-a Minister office hrang hrang tlawh kualtu kan corr sawi danin, Minister 11 zinga 10 ten an pisa luh dawnah complaint box an hung a, heng bawmah te hian lekhathawn tla a tam lo hle a, minister 5 te bawmah phei chuan an hun tan atanga nimin thleng khan mipui atangin rawtna leh sawiselna lehkha a la lut lo a ni.

Minister zingah Minister of state Pu B Lalchhanzova bawm a lun ber a, bawm an hun tan atanga nimin thleng, thla 4 bawr vel chhungin lekhathawn 14 a tla tawh a, chung zinga a tam ber chu a enkawl zinga mi, land Revenue and Settlement department kaihnhawih a ni a, ram pass chungchang a ni ber a, Minister zinga bawm hung hmasa ber Health Minister Pi Lalrinpuii bawmah lekhathawn 10 bawr vek a tla tawh bawk a, Pu K Sapdanga bawmah 1, Pu F. Rodingliana bawmah 1 leh Dr. Vanlalhlana bawmah 2 a tla tawh bawk a ni.



## ADVISER TO CM

Adviser to Chief Minister Pu TBC Lalvenchhunga'n kawng hrang hranga sawrkar sum inren avangin pawisa tam tak an hum thei a ti a, mipui hmasawna tura hman ngei a ngaih thin avangin kawng thenkhatah erawh pawisa hman tam ngai a awm tih a sawi.

He thu hi Akashvani palai nen an inkawmna ah sawiin Adviser to CM chuan department thenkhat ah hna a khaihlak theih dawn avang leh mipui hmasawna tur a khaihlak theih avangin sum renchem vek a theihloh a ti a, sum hman ngei ngaihna tam tak a awm a, inrenchemna an kalpui chu awmze neia kalpui a ni a, MLA te leh officer lian ten MR an chhawr theih chin tih tlem anih avangin thla tin cheng nuai 12 atanga cheng nuai 14 an hum thei tih sawiin insawhngheh kum an hman chuan awmze thui tak a nei dawn a ti.

Pu TBC Lalvenchhunga chuan kuminah leiba chhawm tam tak bakah pension hlawh pekchhuah tur tam tak a awm a ti a, GP pung te nen a vaiin cheng nuai 400 chuang an pe chhuak tawh tih a sawi bawk a. Hetihlai hian, sorkar hnathawk hlawh chu a hun

takah an pe thei char char a, sum dinhmunin ziaawm lam a pan theih nan theihtawpin hma an la tih a sawi bawk.



## CONGRESS PR

Mizoram Pradesh Congress Committee MPCC Treasurer Dr. Lalmalsawma Nghakan Sum inrenchem austerity measures tih leh ZPM inhmehloh thu in sawi a hlawh chhan chu ZPM sorkar a fawngchelhtuten chhia leh tha hriatna an hmansual avangah a ngai tih a sawi.

Congress party Friday political session vawiina Aizawl Congress Bhavana neihah he thu hi sawiin MPCC Treasurer chuan Enchhin sorkar, kalphung thar sorkar chuan Sorkar kalta ten an tihngam loh tur an rawn ti chho mawlh mawlh mai a ni a ti a, Minister of state rank 7 an awm a, adviser panga, secretary rank an awm thluah a, consultant leh Board chairman duhsak zawng an indah a, heng ho zawng zawng ken telin sum a sen tur zat hi a tam tham hle a ni a ti a. Austerity measures leh heng an kalpui dan hi thil inhmeh lo tak a ni a ti a. Mipui te phurrit siam belhin MNF Sorkar tih ang bawkin Petrol leh Diesel a chhiah a pung thur thur a ni.

Buhfai supply tu thlan danah ringawt pawh austerity measure an lak loh zia a chiang hle a a chhang sang zawk an pek avang hianZPM sorkar chuan kum tin Cheng nuai 790 dawn a sen belh dawn a ni a ti.

Ram pumah mipui an rum mek tih sawi bawk a. Dr. Lalmalsawma Nghaka chuan Sawhthing chingtute'n an sawhthing a tam avanga rum an tam hle a, vawk vulhtute an rum bawk, kawngpui a chhe em em bawk tih sawiin mipuite harsatna sukiangtu ni turin ram hruaitute an intihhniam a ngai a ni a ti bawk.



## LAWNGTLAI POL

An lungawilohna lantira Lawngtlai District a Petroleum Dealer ten kar khat dawn Tuialhthei an chahluh tawh loh hnuah vawiin atang khan titawpin, dan pangngai angin an kal chhunzawm dawn.

Lawngtlai District Petroleum Dealer te chuan thuchhuah siamin, July 29 atanga Tuialhthei an chah belh tawh loh avangin

Lawngtlai District chhunga Filling station-te chuan Tuialhthei dahkhawl an nei tlem tawh a, Sawrkar hotute, Tlawmngai pawl hruaitute leh Kohhran hruaituten an ngenna a zahawm an tih bakah mipui tan hun rei tak harsatna siam sak tha an tih loh avangte leh harsatna an neih thenkhatte chin fel anih theih dawn avang te in Tuialhthei chahluh loh an kalpui chu titawp an ni tih an sawi.

Lawngtlai District a Filling Station atanga Tuialhthei hralhchhuah leh leituten harsatna an tawh thin vangin Petroleum Dealer te hian an harsatna sutkian a nih theih nan hma an lakna tichak turin tunkar Thawhtanni atang khan Tuialhthei hi an chahlut lova, hetihlai hian Central YLA chuan Rakhine State ah dan lova Tuialhthei leh Leitha luttur ngawrh takin an ven chhunzawm a.

Lawngtlai District Petroleum Dealer te chuan Petrol la thinte zingah barrel 5 aia tam la turte chuan Deputy Commissioner's Office atangin permit lak zel ni se, permit nei motor-te chu CYLA duty ten dan loh nise" tia District thuneitu hova Meeting an neih a an thurel chu an mahni hriattir leh berawn lovin tihdanglam a nih thu an sawi a, an thurel siamthat a ni chu an hriatpuiloh thu sawiin, barrel 5 aia tam Tuialhthei la turte chuan DC Office Lawngtlai atanga permit la hmasa tur leh, permit neilo te chu barrel 5 aia tam an pektheihloh tur thu an sawi.

Sawrkar, NGO leh pawl hrang hrang ten ram leh hnam a him theih nana theihtawp an chhuahna leh hma an lakna te lawmawm an tiin an thlawp tlat tih an sawi a, Mipui lam pawh dan lo anga Tuialhthei hralh leh lei kawngah inhnammawih lo hram turin an in ngen a ni.

<><><>

## **MZP CHAMPHAI**

Champhai Mizo.Zirlai Pawl, Headquarters chuan zirtirtu dah phutin Govt. Champhai College Pisa leh Zirlai Class kal tur an dang a, eng chen nge College kal turte an dan zui dawn hriat a la ni lo.

Hemi chungchangah hian MZP Hqrs.Champhai chuan thuchhuah siamin, Govt. Champhai College a Political Science leh Economics Department Zirtirtu indaih lohna sukiang turin Mizoram Sawrkarah ngenna an thlen in awmzia a neih loh

avangin Mizo Zirlai Pawl, Headquarters Champhai bul tumin Sawrkar laka an lungawi lohna lan tirnan leh sawrkar karna atan Govt. Champhai College Zirlai leh Zirtirtu te Class kal tur an dang ta a ni.

Govt Champhai College kianga punkhawmnaah MZP hqrs. Champhai Secretary Ralte Zodingliana chuan thu sawiin Govt. Champhai College a zirtirtu indaihlohna phuhruk anih theihna turin MZP chuan hma a la tawh thin a, vawiin thlenga Sawrkar atanga chhanna engmah an la dawn loh avanga an lungawiloh thu sawiin MZP te chu Sawrkar nawr kal turin a tul ang zelin hma an lak tur thu a sawi a ni.



## **GOVERNORS CONFERENCE**

President Draupadi Murmu-i kaihhruaiin Governor Conference ni hnih awh chu vawiin khan Rashtrapati Bhavan-ah tan a ni. Tun tum hi President Murmu'n Governor Conference a kaihhruai vawi khatna a ni a. He hunah hian state tin Governor te an tel a. Anni bakah hian Vice President Jagdeep Dhankar, Prime Minister Narendra Modi-a leh Union Minister Amit Shah, Dharmendra Pradhan, Ashwini Vaishnaw leh Dr. Mansukh Mandaviya te pawh an tel a ni.

Prime Minister Narendra Modia chuan social media ah Governor Conference chuan hmasawna kawngah a puih tur thu leh mipui rawngbawlna lama thil tangkai tur anih thu a sawi a ni.



## **KERALA**

Kerala-a Wayanad district leiminnaah ruang zawn hna ngawrh taka thawh mek a ni. Vawiin thlengin mi 300 dawn an thi tawh nia thudawn a ni.

Chhanchhuah hna thawh ni li naah sipai ten Padavettikunnu ah mi pali damin an chhanchhuak a. An zingah hian hmeichhe puitling leh naupang an tel a, thlawhna hmanga thiarchhuah an ni a. Leimin nasatna lai Churamala, Mundakai, Attamala, Chaliyar ah te chhanchhuah hna ngawrh takin thawh a ni a. Chhanchhuah hna thawk tute hi mi 1500 vel niin team 40 ah an inthen a ni.



## PARIS OLYMPIC

Paris Olympic ni sarihnaah India thalkahthiam Ankita Bhakat leh Dhiraj Bommadevara te chuan Indonesia 5-1 a hnehin quarterfinal an lut a. Silai kahah Manu Bhaker chuan 25m Pistol ah Precision Qualification zoin pathumna a ni a. Vawiin vek khan lawngkhalh thiam Vishnu Saravanan leh Nethra Kumanan bakah golfer Shubhankar Sharma leh ganganjeet Bhullar te an inlan a. Lawng kar chak Balraj Panwar pawh vawiin khan a inlan bawk a ni.

A pumpuiah China chuan gold medal 12 lain hma a hruai a, USA in gold 9 lain a dawt a, France leh Australia ten Gold 8 ve ve lain an dawt a. India chuan bronze pathum lain 44 na a hauh mek a ni.

